

CTNL: 25 anos traballando en lingua

A Coordinadora de Traballadores/as de Normalización da Lingua (CTNL) celebra o seu 25 aniversario cunha serie de cinco conversas en liña sobre diversos aspectos do percorrido da asociación: os primeiros anos, o contexto de traballo, a relación cos SNL, as actividades e recursos e o presente e futuro.

[15 de decembro de 2021]

No ano 1996 constituíuse formalmente a CTNL, con moita ilusión e gañas de colaborar e compartir recursos e coñecementos para sermos mellores profesionais. Neste ano 2021 conmemoramos un cuarto de século traballando co fin de mellorar o labor técnico de normalización lingüística. A CTNL decidiu celebralo analizando en conversas informais o que ocorreu durante estes 25 anos.

Nunha serie de cinco conversas en liña, **conducidas pola xornalista e escritora Rosa Aneiros**, diversas persoas que pasaron pola directiva e con diferentes perfís profesionais e antigüidade na asociación analizan varios aspectos do percorrido da entidade. Os obxectivos destas pezas son:

- Difundir e lembrar o labor da CTNL, dos e das técnicos/as de normalización lingüística e do traballo feito ao longo deste cuarto de século.
- Facer unha panorámica das claves sociolingüísticas que caracterizaron estes 25 anos e a súa repercusión na normalización lingüística.
- Reflexionar sobre o futuro da normalización lingüística como proceso social e como ámbito de traballo.

As conversas estrearanse na [canle de YouTube da CTNL](#) ás **21.00 h entre os días 15 e 19 de decembro** e serán difundidas nas redes sociais da asociación. Adiantamos unha [pequena píxula de todas as conversas](#), onde as persoas participantes definen a CTNL cunha palabra.

Conversa 1: [as orixes e primeiros anos da CTNL](#)

Estará **dispoñible desde o 15 de decembro**, ás 21.00 h, e participan nela **Soco García Conde**, técnica de normalización lingüística do Concello de Santiago de Compostela, fundadora e primeira presidenta; **Marta Souto González**, técnica de normalización

lingüística do Concello de Vigo e socia fundadora, e **Daniel Romero Rodríguez**, xestor de actividades culturais e de normalización lingüística do Concello de Fene. Analízase como comezou a CTNL e lémbrense as primeiras iniciativas para mellorar o traballo técnico de normalización lingüística.

Conversa 2: [o contexto de traballo](#)

Estará **dispoñible desde o 16 de decembro**, á mesma hora, e participan nela **Ana Iglesias Álvarez**, investigadora e docente na Universidade de Vigo; **Rosa Moreiras Cuñarro**, técnica de normalización lingüística do Concello de Ames e exsecretaria da CTNL, e **Susana Mayo Redondo**, técnica do Centro de Documentación Sociolingüística de Galicia. Nela coméntanse os principais fitos do contexto de traballo destes 25 anos: avances e retrocesos na política lingüística que influíron no labor das persoas que traballan en normalización lingüística.

Conversa 3: [a CTNL e os servizos de normalización lingüística \(SNL\)](#)

Participan tres técnicas de normalización lingüística de ámbito municipal, que iniciaron o seu labor profesional en diferentes momentos destes 25 anos: **Mónica Fernández Valencia**, do Concello de Ourense e secretaria da CTNL, **Conchi Cochón Rodríguez**, do Concello de Pontevedra e expresidenta da CTNL, e **Xulia Rigueiro García**, do Concello da Coruña. Falan de como a asociación lles serve de axuda para o traballo, o encontro e a colaboración e dalgúns proxectos que se impulsaron a partir deste intercambio, como o programa [Apego](#) ou [Youtubeir@s](#). Estará **en aberto o vindeiro venres, 17 de decembro**, ás 21.00 h.

Conversa 4: [actividades, recursos, proxectos e campañas da CTNL](#)

A partir do **18 de decembro**, á mesma hora, poderemos escoitar a **Nel Vidal Barral**, docente, extécnico de normalización lingüística do Concello de Carballo e expresidente da CTNL; **Dores Sánchez Alegre**, técnica de normalización lingüística da Deputación Provincial da Coruña e exvogal da CTNL, e **Tono Formoso Lado**, fundador da Cooperativa Fabaloba e tamén exvogal da asociación. Eles falarannos das diferentes vertentes do labor desenvolvido desde a CTNL, con campañas tan célebres como [Gústame o galego](#), e da forma de traballar da asociación.

Conversa 5: [presente e futuro da CTNL](#)

Pecha a serie unha conversa onde se analiza a situación actual da CTNL e os retos de futuro, que deben pasar por unha maior rede de SNL e estabilidade laboral. Participan **Isabel Vaquero Quintela**, técnica de normalización lingüística da USC e socia fundadora; **Luís Pérez Barral**, técnico de normalización lingüística do Concello de Outes e na Mesa pola Normalización Lingüística; **Olga Patiño Abeixón**, docente e exvogal da CTNL, e **Anxos Sobriño Pérez**, actual presidenta. Estará **dispoñible desde o 19 de decembro**.

Todas as conversas foron gravadas en liña no mes de novembro coa coordinación e soporte técnico de [Nós Televisión](#).

+Info:

- Para máis información pódese contactar coa presidenta da CTNL, Anxos Sobriño, a través do teléfono 629 571 950 ou nos enderezos electrónicos presidencia@ctnl.gal e inf@ctnl.gal
- Web: <https://ctnl.gal/web/portada.php>
- Facebook: www.facebook.com/LGX15
- Twitter: <https://twitter.com/ctnl>